

皇明經世文編

皇明經世文編卷之三百十五

華亭

徐孚遠闇公 宋徵璧尚木

選輯

陳子龍臥子 周立勲勒卣

董姚申士餘叅閱

白石先生集

疏

蔡汝楠

據愚個言邊情贊脩攘以光神武事疏 邊情

臣觀六月邸報虜入三關仍擾太原仰惟 陛下屢降 明旨修飭兵政邊民有患痼瘕在已思惇德允

元之實、求威名折衝之臣、天下聞陛下哀濟羣庶、伸暢威靈、咸深戴賴、至於邊民、若被更生、不勝幸甚。頃者南方傳言虜至潞安、稍稍遷動、恐窺井陘、趨河南、或不可支、旋聞出境、臣竊思陛下可稍慰北顧之心、然虜北去、豈將帥宣威武能制其然實陛下。乾剛所運、先聲遠馳、庶令震疊在虜、爲力攻所未能、以倦而歸耳、臣思近年北邊爲患、稍進、則張皇太過、一去、則晏安不憂、臣以今日之憂、正在此、不在虜、語云、不患其侵、而患其所以侵、嘉靖十九年、達虜之犯

興嵐止二萬耳二十年犯太原石州差增前年而亦止十餘萬今年遂深入太原且窺澤潞比之蘆溝橋已切神京南之臨清腹心要地聲言無復顧忌其

所以敢犯神畧顛越至此者由來有漸矣集部落亦且內招我民如板井之屬是也俺答非但外

夷性勁強尤善招集部落充斥誘引日繁加剽掠之

富因河套之利連年傷殘中國怙桀驁而乘空虛反坐所勝將懦兵疲食少律疎以竭當益中國適坐所不能勝事機曉然獨去秋至今一載之中稱不廢經畧而應敵之效逾見餒弱臣思廟筭無遺而臣下

或承宣未悉、抑不虞兇烟、庶幾未來、有談邊之名、無
戡定之實、緣至於此、但今年較昔、已自不同、何以支
來年之愈甚耶、自古禦夷、咸先自治、養銳以待、猶或
矢之、易曰、重門擊柝、以待暴客、蓋取諸豫、未聞臨事
爲備、而得至計者也、臣以邊境疊孽尚在、赤子金夷
未瘳、誠復入寇、必挫其鋒、庶弭遠患、不然、何以厭狼
獍之心、冀靜息之日、儒生之見、輒曰、去則不追、無邀
邊功、此正誤今日國事者、夫應兵勝敵、不與要功、絕
漠者同、如其能勝、彌章今日之武功、無損朝廷之

文德、又虜雖猖獗、與往代之有所據依者畧殊、至懸
孤軍深入千里、極爲下愚、要之特游魂假息耳、漢光
武曾以昆陽數千兵、破尋邑百萬之衆、虜非尋邑可
方、兵視昆陽加盛、撫我盈盛、益以智勇、虜何足言、此
必戰必勝之計也、獻計者近亦甚衆、參籌邊塞、言人
人殊、豈無譙言嘉謨、可備採錄、第未聞有確然用其
謀策、致邊境綏靜之福者、出所臆度、未免膚引繁文、
訛舛地理、而部司指摘爲瑕、遺其精料、獨臣以兵難
遙度、雖趙充國、漢之老將、不至金城、不敢深言、故凡

開陳邊圉之事願 陛下明勅部司錄其大體畧其
微瑕務裨事實不靳施行庶智者先無遺謀勇者自
能畢力臣本謏庸深慙武用至於兵革尤所未聞獨
戀國憂心每惟大體更求緩急區別事宜蚤夜究繹
欲効微末况 聖人明目達聰之日雖曰天高惟冀
聽卑臣惟方今事勢有關 朝廷綱維修順治以振
威嚴者八係邊境事情祛風弊以興新政者十即於
邊境之中開拆機宜爲責近功以弭邊患者六經遠
猷以圖永寧者四無非欲 陛下樹根本之政悉萃

夷之情、酌緩急之分、決勝負之策、其他縷細、不敢踰度、亦不敢輕言、夫樹國必有闡外之寄、扞城四裔之民、夾輔中朝之盛、故將與相等、皆係天下安危、雖烽警寂息、海內晏然、亦當注意將相、矧今時事當復何先、故建議百端、無如用將、議者皆曰、天下文治久安、文恬武熙、名將之材、恐未必有、縱有其材、誰則知之、不知天下士如棋布、惟所用之、以爲勝負、必借材異代而用之、是舉世道而任其降挹也、臣甚謂不然、去歲邊事孔棘、會舉將材、如尚書唐龍等、今曾用之、

皇明經世編

白石先生集

卷之一

邊情

四

平露堂

乎此臣所謂一退而晏安不憂者也。將材在往時姑以異代難引證驗。即如太祖高皇帝肇興淮甸。當時從者徐達、常遇春等。起自側微。沐英以養子用。傅友德以降囚用。各著徽業。封至公侯。此數臣者。豈平居蘊畧。預識其然。由太祖駕馭。各能爲用。假令數臣生今之世。何以甄辨之。其遠跡草萊。不能甄辨。猶可諉曰不能。今試有成效。衆望所歸。荐揚旣及。而爵位若慙。此不知何說也。故臣以爲將未嘗乏人。而人未嘗用。陛下試以科道所舉者。若兩京同辭。或撫

按有荐先年敝歷載在司功者。斷然用之。責其成效。如郭隗應禮賢故事。何患將來之不集哉。見而不舉。舉而不先。更求堪用。非所聞也。如所舉之將。幸能用之矣。其所資以用者曰權。郭子儀相州之潰。以九節度之師。無所容其力。曹彬受一劒。以下江南。非曹彬智。而子儀弱。在委任重不重耳。細柳之軍。御轡不馳。江南之役。至權貴不欲從。爲副將。今縱曰無此將材。矣。然曾謂有此委任乎。兵法曰。國不可以從外理。兵不可以從中御。今總督諸臣。動輒牽制。賞罰不能信。

芻糧不能給、繕修不能專、攻守不能調、倏然欲行、奄忽報罷、甚則擿缺小疵、至相繩責、請兵請糧、此正爲國事然耳。旁皇哀求、延頸企踵、而內應不至、其鯁鯁然結疑慮之懷、而臨事蓄縮也。此皆爲賢者論、稍有以得失凶吝回滑其中者、求安之術、無所不至。至有謂京師發銀、自關而出、亦自關而入、保全之道、不得不然也。七月邸報、起用原任總督都御史翟鵬、委任之道、似與昔殊、恐達賊一去、此意不申、當時舉動一彌文耳。臣願陛下明播此意、申自部司、斷自

宸衷機爲手勅附近巡撫而下咸使聞知凡軍旅纖
悉各聽翟鵬相機運動據所成策具本奏聞其陝西
薊州河南山東諸路不聽宣大節制者即許翟鵬參
劾偏裨以下以軍法處之其有容隱亦以罪論若不
能悉心効力縱醜類爲廟堂憂此則翟鵬之罪在所
不宥其他如戰攻之具芻粟之峙車馬之備勒兵
之法聲援策應之勢盡以付鵬庶幾經營酌量部司
不得阻撓於前文吏不得躡尋其後不必疑留而後
行罰無俟敵至而後策勲鼓無前之勇收敵愾之効

皇明經世編

卷之一

六

隨形裁割第有可觀西路總督三邊移文申勅亦復如是此謂未有必勝之民先有必勝之將兵家以氣爲主將帥之氣旣已百倍他復何憂此任將不可不重也臣見國家列聖相繼壽考作人陛下諮詢賢哲於茲二十餘年至用一將官遂難其選先後廷臣論荐止一翟鵬言官所舉如唐龍等亦不多得非所以推延多士彰顯聖朝兵法曰選將於卿卿可將也周之尚父方叔鷹揚翰飛入則爲師臣出則爲將帥當今人材或未易比但臣考漢制邊方有警左

右之臣皆堪出師。唐團練觀察自員外郎中以上皆
任將相之職。排難解紛。英俊代見。今左右臣工。何其
遠讓漢唐。稱乏良將。臣雖驚下。竊爲恥之。然其故何
也。間嘗質問舊臣。緣得其由。即我 先朝用人資級
不如是之限。等分不如是之明。京堂不如是之員。在
今士習樂清虛而厭任事。以省曠爲華要。以職事爲
冗官。夤緣求進。冀陟清階。四品五品京堂。旣由此舉。
將來巡撫以次推用。履歷便捷。一超而上。積以成風。
抑然也。當今四郊多壘。督撫之臣。號爲長塗。由是使
臣以國家平時。不愛京堂以寵虛倖之士。一旦有急。

各以兩司推巡撫巡撫不得全用無有戮力任事者其他能臣又一切散布下寮格以

兩司欲中外間授蓋銓序人等又一變也

常例有才莫展此憂時者所以必爲之太息也 陛

下清閒之讌一問輔臣在朝京堂誰堪軍旅以何助

庸躋陟至此則其故可知矣請自今凡四品五品京

堂如有推陞廣求賢俊無泥成規既陞之後欲如先

朝特差經畧故事分遣數員行歷各邊據所策謀行

之總督年終還朝以備敷奏其不閑韜畧難稱巡

撫者陞遷之日許科道官即時叅劾改調外任徐試

功能因使髦士滿朝左右可用翼宣 陛下精明之

政不獨爲。今日養將而已。至於武職。猶有可言。公侯國戚。世守山河之盟。莫揅緩急之用。臣欲請應襲者。赴兵部習觀時事。弱冠堪用者。即令充偏裨。履疆場。一受節制於總督大臣。使襲替之後。遂領總兵之職。庶重祿之下。自有賢才。而世家不至乏人。然後乃武乃文。帝心簡在。惟命所適。詩稱濟濟。何以加焉。獨養將者。天子之事。又吏部兵部之事。乃者邊方失事。該山西巡按御史童漢臣。劾總兵官張達。巡撫都御史劉臬龍。大有等。誤事註禍之罪。此三臣誠有罪。

矣。張達臣不知其詳，不敢謬論。第劉臬等本持橐簪筆之臣，責其冠軍決戰之績，其何能及。必至是耳。邊事之警，不爲不急，詢于九卿，不爲不衆，決于吏部，不爲不公，竟無武畧之用，或貽彼已之譏。陛下有以知近日之舉將乎？每一邊將員缺，廟堂之上，相顧無人，非因分誼疎逃，登崇日淺者，舉以中之，則爲人處缺而已。其畧負譽望者，恐其見推而幸其不舉，自負不訾之身，先虞不測之禍，誠何心哉？臣以爲今日與陛下共此生民之憂者，誰也要之邊境之憂，上

則朝廷下則生民耳。臣思今日之警正屬殷憂。吏部尚書許讚起自河南蒙恩遇特厚。陛下又宣召而面勅之。今後舉將但在得人。不避權貴。不卑小官。無爲人處缺。以基禍階。康濟實用。非綴文飾虛者。所辦讚必感激。能有以報効。陛下。臣又聞先朝兵部尚書馬文升留心邊事。延訪武臣。每攜簡札。出入懷袖。大小將材。躬自筆錄。每有報缺。器使得宜。兵務周悉。陛下遴選廣衆。得如文升者。以更本兵。豈如今日之大謬不然耶。大抵舉將無文武。取之有二。

一曰倜儻。二曰耿亮。倜儻者。彼且圖其大而況矜細。
耿亮者。彼且爲我死。而況謀生。有小才而持齷齪之
懷。負細能而無捐生之志者。不用。總在吏兵二部得
人。惟願陛下神裁而已。虜患頗緩。所宜亟正者。
朝廷之紀綱。紀綱維何。曰。朝廷所以令天下震服。
不敢違越者。法耳。春秋城濮之戰。而子玉誅。五代史
高平之役。而樊愛能死。卒之爭長江漢。而威震關南。
此明法令之効也。今三法司明刑畿內。用克弼成政
教。然見近禁網頗繁。密於巖廊之前。闊畧於邊境之

上求諸邊激勸不可得也。往因陛下垂恩曠蕩，將

士恃恩以至今日。但去年石州太原之犯，猶先抵

戰，至撐拒不勝，然後摧靡。陛下赦原，斯有可言。今

年李恭李朝陽楊德何堂盧瑾張文懿或假按伏以

按伏之失策

避聲勢，或恣旁觀以失事機，或守拘攣以絕策應，罪

皆難原。而李恭遠任懷仁，退避嶂頭，致賊過左衛犯

馬邑而漫然不知，若言鋒不可當，何不殊死一戰，遽

令深入，罪狀尤甚。臣恐有掇拾殘功，希掩惡跡，俾其

漏網者。臣本刑官，謹按大明律，失悞軍機者斬，豈有

皇明經世編

卷之一

十

虜越城堡、踰重關、城外開箱爲賊虜掠、而無一人當其罪者、兵法一鼓作氣、曾不一鼓、曾不成列、斯其謂何、不用命戮於社、三代已然、不能謀人之軍而歿、亦載於禮、將臣可宥、百千生靈之命、獨不可閔耶、朝廷閔生民而勅法、將臣引禮誓以就刑、此於明作之中、實寓中孚之意、願陛下即下紀功官、明勸以付法官、處以前罪、不惟典刑慎修、且令邊塞踴躍、前車旣戒、作新將來、此謂紀綱正、紀綱正、而次第不舉者、未之有也、將官布列、所欲言者、又在明其職守、即如

山西巡撫臣曾詢訪故典原應於鴈門住劄故其官
銜欽差提督鴈門等處地方朝廷之意先鴈門
而後山西遑徼靜而後內郡安也今移入省城矣重
兵利器擁以自固甚非朝廷設官之意大將旣然
踵舛效尤諸將可知未至而懼戰戰惴恐各擇安固
自保其軀誰有爲國當敵者請自今申明職守山西
將官各於臨關處所建立衙門不令仍前深居避敵
巡撫一移其他自動斯偏頭鴈門等處元戎耀威部
曲生氣乞命兵部即行山西將遷改日期隨具奏

聞不至因循斯亦計之可採者也。兵法固宜聯結聲援於內，尤須撫安內附者以絕虜援。因防首尾衝決之患，趙充國伐先零而赦罕开爲此耳。近見該部具題行河南山東保定各巡撫都御史俱於要地設備，又選領精銳河南爲山西援，山東爲河南援，保定仍與山東河南聯會，併力擒勦。庶在內諸路成聯絡之勢，併甲兵之力。然虜亦有援，不可不慮。俺答吉囊旣來深入，而小王子與俺答內不相善中國尚未知之小王子擁衆數萬於獨石地方，最爲伉健。且援東則東應，援西則西應，變動難測。方宜周防，東

路朶顏諸夷西番各酋俱假進貢貪求無已稍一裁損彼輒不堪而三衛尤甚每稱結婚西北搖脅邊臣即此見其禍萌已動萬一連結干戈搖動心腹計將何從夫醜夷之屬却之成怨受之則驕獨乘其習久易制及其崛起難馴雖難遂其豁壑之求不可致其怨背之患臣欲請起用邊方大臣赴京候用者特命一員總督遼薊地方綏徠諸夷宣示威福關外營中視爲一體山海內外總一事權西番內附者申命寧夏總督都御史賞諭優納示國大體務假羈縻之虛

文遂斷北虜之羽翼。庶固內援。永絕他患。京師者天下之樞。比因時事。京師戒嚴。內外震肅。修飭興作。庶幾乃事事有備之意。獨築外羅城之議。至引小國三里之城。七里之郭。爲喻。臣以爲不然。夫成周爲邦君樹藩屏者。千八百國。後德衰。自相征伐。于斯時也。以諸侯攻諸侯。因各以全國之力。營一城郭。以自衛。絕大國侵凌之患。今天下全盛。金城鞏固。且京邑翼翼。四方之極。民所會聚。比屋結楹。雜集浩穰。當連三輔外郭之建。焉得人人而納之。旣傷無外之化。不免勸

城京師示弱非所以張形勢也此論是也

作之勞此臣所謂張皇者也。臣願凡京師興作亟須
停息。悉心輸力。專事邊方。縱謂不當解嚴。亦在命提
督團營尚書劉天和加意團營。勾補缺乏。選練精強。
或於九門各擇便地。聽其散操。其京軍散處各縣。或
武清西河地方者。取其正軍。充實京城。斯亦不可謂
之不嚴矣。若竭帑財而示張皇。努力經營。反爲虜笑。
臣不願今日爲此。以上任將。用將。養將。舉將。振紀綱。
明臣守。固內援。停工役。凡八事。此所謂關係朝廷
綱維。修順治以振威嚴者此也。兵必先定制。而後士

衆不亂，士衆不亂，而後刑罰乃明。刑罰既明，而後萬人齊力。故兵法曰：卒畏將，甚於畏敵者，勝。未聞豪悍緩散，擁數萬之師，執狐疑之心，乃得勝策者也。臣居京師，昨頗知大同鎮軍自癸巳李瑾之變以來，猖狂恣睢，驕氣未殄。將帥曲爲包容，各雖服從，實懷無忌。鎮軍旣然，諸部相效，間居則揚揚莫禁，有事則選勇不前。大同地方切近偏關，偏關之與河套初無限隔，實爲虜衝。以驕軍切近虜衝，斯已著之患。且達虜往時每於延綏固原等處爲患，今獨從大同，何則？延綏

忠勇而大同易與也。臣每聞議大同軍者輒爲拊心
嗟嘆謂撫御無人至厯宵旰之懷揆度處之方
兵不爲用由不服操練不服操練由饋餉不給饋餉
不給狂駭怨詈至不可言則處大同之道莫若糧餉
爲急乞將大同貯倉銀米亟補軍人月糧之缺令都
御史翟鵬曉諭豪強示朝廷恩信且官軍涵浸
聖澤垂二百年何至一旦陸梁至此朝廷不即誅
歾令爾自新卽塞前愆又垂仁賑給此外何求仍前
不悛有法而已尤有未協及於街坊肆行不逞者須

皇明經世編

卷之一

古

平

付法以警諸軍。若謂月糧未易即補。如副使胡松建言。減班軍之費。以益鎮軍。未見舉行。似當酌處。又聞大同因軍不服。操演教場數處。鞠爲茂草。糧食一充。操練最急。臣以處邊莫若先處大同。乞下兵部詳議。先示輯柔之仁。繼收震讐之効。臣又聞偏關之外。套虜渡口居多。而防守無正額之兵。近畧多借民壯。改戍軍人。及關內隘口。亦稍稍整集。夫少置兵不能固。而多屯聚不能給。而議者輒曰。例外發銀。恐不可繼。今之空運。正非欲其繼也。解一時之兵患。備一二年。

之兵食耳。且動搖之禍。與輸轉之勞孰大。此較然者。若三軍以乏食喧躁。主將以乞糧哀請。形之外夷。非所以杜塞克殘。宜令宣大將官酌議。一二年常費。及客兵調集之用。本年解到京倉銀米。或臨德等處倉糧。亟爲量發該鎮。以慰士卒之心。壯禦侮之本。儲峙旣豐。尤在保障。山川丘陵。以爲地險。王公守國者。因之。因其自然也。故防邊者。因險爲關。因高爲臺。因曠爲堡。所以外固藩籬。內資耕穫。戰守相藉。治邊者。輒曰築城。夫用百萬之力。糜百萬之財。使邊人騷騷而

不得輒寧者。此也。築之縱成。虜寇潰牆而入。曾不踰時。而數萬壓境。一年之中。若未遽成。百勞而無一逸。永費而無暫寧也。臣以修堡易。修城難。願用兵部主事許論邊論。修築五堡鎮城。兩掖二堡。議募軍分駐。纍纍相望。犄角之勢。匝月而成。所謂馳聲而責實。形格而勢禁也。又臺堡成列。加以溝塹。馳驅艱難。乖其所之。夫懲張文錦處置失宜之變。因廢經久無患之策。昔人稱長江天塹。有時而渡。若平地然。故又以人爲城。奈何兵士不充。必資召募。因癸巳大同之患。常

召募竟不得人。或不應募。遂莫有言者。不知當時爲處置乖舛故也。懲嗜廢食。良謂不然。近該科建言。於山東北直隸徐邳等處。各召募勇敢。送赴軍門。職則謂軍非土著。無益勝敗之數。不習騎射。不知山川。不耐寒苦。無親戚切身之讐。而退有後地。雖有應募者。亦不可用。當各就本鎮附近。招來官舍居民。凡趺弛之士。精悍之徒。俱堪收馭。在足其用度。加其廩餼。均其更番。備先鋒者爲上。備行列者次之。久久號召。分之部署。當自得人。不可令勾補破其家。不可令役使

妨其業。不可令入籍世其軍。恤其疾苦。懲其侵候。明
揭榜文。庶爲永式。且三晉地故多逋蕩。無賴。至於大
同鎮前後名爲官人者。多鬪販興利。劫財殺人。抽取
市貨。法制所不能禁。尤恐其轉徙而爲虜資。請遂收
之以益邊兵。漢唐邊釁。不減於今。而匈奴之敗。頡利
之禽。光著史冊。宋至削微。猶有鬼章之捷。足爲美談。
夫何數年以來。士氣不振。竟無一舉。可以愉快人意。
何以厭塞天下喁喁之望。北虜未喻。聖德凌撥二
垂。雖彼之充滿方甚。而邊人之憤怨已盈。又虜者易

盈易畏清風店之捷也先喪氣馬文昇經畧西邊而
火篩獻俘由此觀之在經畧與力戰耳今北方經畧
莫甚於兵臣考宋止延經一路尚屯兵七十餘萬不
意今日大同止八萬餘人又分析隔散其所分地輒
不相揀狹隘之處守者以千計耳以數千當大衆河
汾之人捧土以塞盟津知其不能勝也近因山西兵
力弱甚每調榆林客兵爲應臣以榆林或不可頻調
榆林以窮困之兵宅不毛之地將士枵腹不得一飽
苟圖行糧冀免旦夕而榆林西路及魚河等處偶一

乘虛彼此受敵。臣不知其所應矣。要之客兵可接遠
援。而不可使近攻者也。惟當廣募土兵。屯戍有法。前
該南京給事中王燁等建議欲聯合軍衆。懲按伏分
屯之弊。臣以爲此議可用。然亦在大將調度得宜。夫
合萬人之兵。非由觀美。實在得心。故曰聖人御衆而
無忿驚之師是也。夫屯兵雖畸零隔越。及其臨敵。不
相爲守。由平居將不卹士。無踴躍用兵之志耳。先令
將帥給養撫恤。無令虛缺所望。如臣前陳足兵之策。
因結合兵衆。彼此協應。閒居則各營會聚。揣形計利。

執機圖勝務利器具或廣間謀當其有事刁斗齊動
烽燧相接自前爲角自後爲犄遠駐爲援雖千百營
而自相呼合促督進戰不得少間乘城拒塞布隊列
陣之師總爲一體靜以待譴逸以待勞揚兵耀武可
以代謀夾攻衝陣可以取捷挫其先鋒必矣不挫先
鋒欲要後路此邊將之失計也惟兵部移文巡撫衙
門務令整合以圖後效一見我武奮揚之功即有櫜
弓臥鼓之次臣聞山西軍民殘耗墟落空疎往年已
然今歲蹂躪之後塗膏草野即其變態當復愈甚原

因將帥失職橫被生民及其死傷倘將帥懼罪闕匿其死奏報不達朝廷煢獨不蒙存卹斯何其劇與中原人心不可稍失用防未萌開錄什一實則千百此弊不可不加澄察陛下即命紀功官今歲所過城邑村落幾何所殺傷幾何其所殺傷請封殖其家砥礪死者且緣定將臣之罪不得掩飾冒功因錄死傷而更議賞罰則濫殺平民而虛稱首級論功加賞而止及權門俘斬移其功獲取規其利如故事者當之責紀功矣此收人心一策也臣思沿邊自染醜虜

苦毒備懼幸而虜還救死扶傷日亦不足徵科目急賦稅不蠲以彼力屈不勝其求更加之笞掠酷烈之痛何以堪此該科參稱主事劉永徵糧太急乞願取回夫劉永亦非不知虐徵之罪第邊事莫先糧餉遂顛心饋輸不恤窮匱非所以稱天子哀痛元元至

意且違固內攘外之道臣思馳驟之餘今秋無望乞遂蠲免今年沿邊田糧若謂邊儲不給亦宜例外發銀如兩淮鹽銀京師各處籍沒資財并臣所謂工役省費皆令發解邊方以甦邊困以固腹心不宜重

徵以搖國本。以上處鎮軍足糧餉。廣召募督戰攻。錄
歟傷蠲賦歛。凡六事。此臣所謂責近功以紓邊患者
也。近該南京吏科等衙門。建言屯田之利。臣竊思之。
以饑餒就戰之兵。使釋戈矛而緣南畝。定猶解危急
之病。而方種拔病之藥也。若戰守有次。此亦當言。然
屯政之利無他。去其害屯政者而已。臣攷趙充國屯
田。自燉煌至遼東。環合萬有餘里。則今西北正在其
中。卒制西羌。遂無邊患。此屯政之利。今沃饒併於富
強。荒瘠困於牛種。耕歛奪於私差。輸稅脅於包攬。屯

地太廣屯糧太重。剽爭無禁。疆畔不定。此屯政之害。其他委曲事宜。在彼中詳定。難以預究。願 勅該部將今年以前凡屯政之害。一切議除。又 勅吏兵二部。於臨邊州縣衛所。州縣置屯田判官。縣丞一員。衛所屯田千戶一員。各兼巡邏。以防剽竊。經畫屯政。又該省布政司分守官。按察司屯田道。各專領 勅一道。督理諸司屯田官。不稱職者。嚴加稽覈。考績之日。務求功能。勿令藻飾虛文。無益邊餉。官有專能。然後地無餘利。兵農不分。耕戰相協。 陛下裁行甚便。近

見該部議處鹽法欲改納銀之例又該副使胡松議抑權豪杜塞賣窩買窩之弊似稍可觀然未聞果濟邊用何也曰積粟無用商賈徹業耕地荒蕪千里沃壤遂成藁葬未易通商要之屯田鹽法實相因成政益法通故佃種益力屯田舉故商賈可依靠陛下即令屯田官痛革窩姦廣募正商稍益常課請吏上納者即備客兵行糧勿歸戶部添置農官而兩法兼舉臣不勝願望但增改鹽課於前須盡減餘鹽於後自先年御史秦越巡鹽兩淮謬增餘鹽希圖恩賞商

人大失其資。今雖裁減，尚或未盡。乞議盡減，以便客商。乞運非恒久之策。鹽糧亦有限之課。西北漕運，不可不深長計也。三代而下，秦漢隋唐，咸都於雍，方物畢至。山西又自古帝王之所都。地形不變，塗路具存。但未之思耳。西路開渠，西漢隋唐，咸有舊路。關東汾晉之粟，歲漕二三萬餘。即今關陝船筏，亦通往來。其在山西者，九河故道，容亦可尋。縱西路有龍門析津之險，山西陸地尚多，悉心求源，開置小河，亦堪短運。陛下於事稍寧定之日，宜召工部裁度所宜，或

相平流以便水運或改陸運以避湍險或置倉庾以便輸納或造舟車以資裝運或時導滌以防淤塞當省陸運五倍之費此願 陛下存省而徐圖之邊方之事誠未易言大寧改而宣府危東勝失而大同弱受降河套隔而榆林饑今之邊疆如人雖非患痿痺之疾亦極羸削之狀者也大寧東勝或有難爲弘治亦曾搜套邊民頗得樵牧其中不圖今日遂爲虜巢稍復故事即能拯安生民此臣所以欲 陛下委任總督官先爲振揀之策益圖萬年之計總在臣所謂

用將者也。他如戈甲之制、弓矢之利、茶馬之政、戰車之法，豈有將賢而政龐者哉？以上修屯田、復鹽法、議漕運、恢邊境，凡四事，此臣所謂燭遠猷以圖永寧者也。臣前所陳者，救時之藥，喻政於藥。臣爾佐爾使爾君，未與焉。臣所謂君者何也？曰：一心志、勤警惕也。臣見數年以來，在朝大臣各不相能，先該給事中錢薇論奏大學士夏言、尚書霍韜自相攻擊，蒙陛下警飭大臣，使相和協。以臣觀之，和衷之德，猶或未能各挾形跡之私，未崇斷金之實。自執所見，弗能相通，治

道良如人身、流通則無患、壅隔則災眚、陸賈之言曰、
將相和調、則士豫附、周勃太尉擁重兵而無所能、竟
成於陸賈之一言、諒哉流通之益也、今堡伍之情、不
通於將帥、將帥之情、不通於總督、總督之情、不通於
本兵、本兵之情、不通於輔臣、故雖朝廷未能悉邊情、
博羣策也、願 陛下勅輔臣以下、協恭盡能、晝畧纖
介、巾 朝廷以及方鎮、由方鎮以及士卒、夙夜圖維、
譬之同舟而防風波之患、鮮有不濟、然大臣瞻仰、又
在 陛下一心、臣考本朝 太祖革胡元、 成祖犁

虜庭明準則以貽嗣服、德業踔絕不可名言。二祖
以下、天順間於也、先成化間於毛里孩、加斯蘭、弘治
間於脫羅干、火篩、雖稍見挫、未申國威、方今勝策、決
之來年之一役耳、燕貽無疆、紹承丕顯、不待再舉而
定、所以優養軼材、爰整虎旅、興昆吾之師、以消跋扈、
振六月之伐、以遏孔熾者、願 陛下日寅於衷、使威
稜遠揚、坐收 廟勝、詩曰、昭茲來許、繩其祖武、此之
謂也、臣向讀漢書、見賈誼流涕太息於漢文之朝、其
言曰、火未及燃、今火已然矣、臣才不逮賈誼、而憂國

或過之。觸情覃思。已非一日。極言邊情。遂幾滿萬。仰
祈俯賜矜裁。

皇明經世文編卷之三百十六

華亭

徐孚遠開公 宋徵璧尚木

編輯

陳子龍臥子 夏允彝璠公

周立勲勒卣參閱

王鑑川文集

疏

王崇古

請發京營兵馬協守南山疏

京兵協守

照得宣府南山圍繞

甲子奴酋從○天壽山入

天壽山之後東接薊鎮之渤

海西接懷保馬水紫荊之關隘先年宣大守固虜騎

雖經犯宣府中西各路。游騎嘗薄鎮城左右。或蹂獨石四海冶龍門直犯懷保延永之間。該鎮兵馬隨路邀擊阻截。旋即遁去。未或敢近南山窺岔道也。祇因二十九年。大虜自薊鎮入犯。蹂鎮邊關內。繞出岔西白羊口。及宣大邊防漸壞。薊鎮數被虜侵。震驚畿輔。貽憂君父。先年督撫諸臣。深憂過計。相度南山形勢。可以列重垣。東護京陵。西連關隘。設重險。示虜形勝。始築聯墩。繼築力牆。深濬重濠。每年分地列戍。邇復召軍駐守。年復一年。足恃保障。但山在宣府

之東南虜駐宣大之邊外。自山至邊遠者二百餘里。近亦百五十里。內地各建重城堡砦。設有分守兵馬。非無拒防。可一蹴至也。且虜聚邊外。必有形聲。哨報先聞。既入大邊諸險。侵入腹裏重地。宣府兵馬當其前。大同兵馬襲其後。薊鎮兵馬禦其內。勢自難騁。故虜雖驕橫。志在搶掠。得利卽旋。原非甘冒險阻。苦爲攻戰。而自取疲勞禍敗也。諸臣原議。每年春秋盡掣宣大山西之兵。專爲併守南山之計。在山西則達返千餘里。士馬疲勞。遠不濟用。致疎本境之防。宣大則

內顧外疎。供餉耗費。坐失各路之守。是掣門戶之兵。以守堂奧。棄其所必攻。而守其所不攻。以衛京陵。心則忠矣。以籌邊計。猶未爲萬全之策。夫宣大各守其境。雖未能阻虜之不入。而猶可邀虜境上。俾不能直至南山。而畿輔可保。宣大掣兵內防。則虜入無忌。即可直至山後。而藩籬愈壞。是守宣大。乃所以奠南山。守南山。乃將以弃宣大矣。以故累經言官按臣條議。皆謂南山固當守。而宣大之兵。不可盡掣。軍門不宜偏處內隅。坐失三鎮之援。誠鑒於往歲山西石州。

之陷。連年山大空虛。不能自固。軍門兵馬。紆遠不及。赴援。連歲南山之守。未窺虜形。徒滋老師之費。故耳。既經科部定議。勅臣總督。仍駐陽和居中調度。其南山之守。責之宣府鎮巡。但該鎮兵馬有限。兼備內外各路之守。委屬不敷。且連年添設守兵。分屯山後。生齒漸繁。蹊徑日闢。伊邇發夷。大啓戎心。向因重兵居守。虜謀坐伐。今驟減戍示弱。恐爲虜窺。今山大之援兵。既難議調。所據宣鎮撫臣議。請京營兵馬二枝。協守南山。誠非得已。臣查得南山見設副總兵一員。

及屯守兵八千五百四十餘員名。近議東路游兵一枝三千員名。春秋協防。每秋再發奇遊兵營無馬官軍一千八百三十五員名。各城堡鄉導疑兵二百五十名。自火焰山起至合河口止。分地擺守。似亦可守。如果虜形東犯。臣當提兵自西馳援。務抄出其前。總兵官趙奇。自保安提兵與同東路參將閻守中兵馬分據其險。該鎮奇游各兵及大同原議正兵官軍卽尾其後。虜雖強衆。自難飛度。但內守之兵。山長口多。兵分勢寡。必須量發京營兵馬一二枝。俾同李官李

浹邊兵相攙擺守。以壯神氣。斯內外咸備。守者拒險
以待虜。戰者分道以邀擊。尤爲萬全。且京營之兵。聞
選練既久。精銳頗衆。但未經戰陣。恐難卒用。若使更
番戍邊。雖未與虜戰。亦可習見邊方之險易。聞戰守
之機宜。卽先朝邊方有警。選發天兵之遺意。具
題請旨。

免遠調山西無益援兵青實戰守疏

免調
援兵

照得山西自偏頭關老牛灣黃河東岸起。東至老
營堡丫角墩止。共長一百四里。是爲該鎮外邊。處處

通賊。秋守邊而冬守河。極爲虜衝。又自丫角墩起東至平刑關石窯菴止。共長七百餘里。是爲三關內邊。中聯寧武鴈門。倒馬諸關。向恃大同爲藩籬。節遇大舉。大同不能堵截。每蹂內邊諸口。直犯關南內郡。該鎮兵馬多係腹裏衛所。素非慣戰之兵。關內城堡星散。道路四通。又難爲扼塞之守。故虜入必飽豕欲。軍民累遭毒虜。是有兵尚難自固。若復將老營游兵及總兵官兵馬二枝。每春秋二防聽援南山游兵。則盡選老營一帶各堡之馬軍。預調合營遠戍保安正兵。

則東駐陽方、去偏老三、四百里、一旦狡虜擁衆直犯老營、外而奸逆之誘煽、內而遠近之無援、非惟老營不可守、卽汾石、隰吉諸州皆可蹶至、北而太原、大川、南而平陽、汾石、亦可深入全晉之禍、將不可支矣、今春俺酋密謀掩襲老營。一夕即至、幸哨報蚤聞、總兵官郭琥連夜趨防、兵方至城、虜卽入境、向若移駐遠地焉能速濟、近議老營堡在山西、獨當虜衝、總兵官兵應議移鎮、免逞返勞費、方俟查議、豈宜復聽東援、坐失西守、歷查節年二防山西、援兵三營雖有分布、

之檄自老營寧武至保安靈蔚、遶返千有餘里、皆係山程石澗、萬一有警、士馬疲勞、緩難濟用、向因老營不時有警、該路游兵、每次議留總兵正兵亦鮮東赴、惟北樓參將原設援兵不足三千、原調太原雁門二營馬軍、各不等、共合一營、聽調策應、臣近行前任叅將牛相開報、各營原議赴援兵馬、每遇調發、路道隔遠、往往緩不及事、且兵非素統、烏合難用、本營逐年挑選各堡止軍、陸續買馬、僅二千匹、即以本營見在軍馬、亦可東援、所遺本路各口、俟督太原營兵馬代

守庶兵有紀律將可專制東西兼濟誠得兵計近准兵部咨據山西巡撫都御史石某具題前事行臣酌議伏乞勅下兵部以後薊昌有事免調山西正遊兵馬東援留充本鎮各路防守其北樓叅將營選定馬軍二千如果虜犯宣大中東各路聽臣調赴蔚州廣昌靈丘一帶防阻紫荊馬水諸口如虜勢移東直赴保慶會合各路官兵併援南山岔西各口庶兵馬免遠道無益之調遣山西獲本境戰守之實用客糧歲省推諉可免矣。

嚴飭山西內郡兵務專責任以伐虜謀疏

專責修守

照得山西一省原設四府關南內地分隸冀寧冀南河東守巡六道關北大同分隸冀北守巡兵備四道沿邊三關累設雁平寧武岢嵐兵備三道內外各分信地間有專奉勅諭職兼兵備分轄各府州縣軍

衛有司撫治軍民其平時選軍伍民兵修葺城堡編立保甲置備軍火器具盤詰姦細督捕盜賊催徵稅糧乃其職守每秋申嚴城守嚴設哨報有警督率有司分投收斂扼塞險阻處備供餉保守疆圉尤爲專

責在邊各道、伊邇虜境、連年虜患頻仍、責任艱大、其經理邊務、亦有成績、腹裏各道及府州縣各官向緣虜患鮮至、各以民事訟獄爲職、未以修防武備爲重、其腹裏衛所各官員冒襲世祿、不通技藝、剝軍營私、優游坐食、邊事不知、騎射未慣、一遇盜賊生發、轉相畏避、無能追捕、尚望防禦虜患哉、臣連年總督陝邊、查照勅諭、揔轄三邊四鎮、文武各屬分別邊腹責成各道、除訟獄民事、臣不經理、餘一切武備軍儲、各有考成、其軍衛有司、歲辦錢糧完欠、職官勤惰、各有

督查遵先臣經略之懿矩、盡節制督理之職任、以故
憲體昭肅、武備咸飭、緩急可恃、近奉移鎮之命、山
西本屬臣鄉、民事武備、夙切疚心、邊腹地里尤所諗
知、歷查節年虜犯山西者十餘次、沿邊則偏老興嵐
河曲保德岢嵐寧武繁峙五臺無所不至、近關則大
原各屬忻代汾石壽陽平定漸次侵掠、城堡多被攻
毀、軍民累遭毒虜、遊騎兩薄平陽靈石霍州之境、散
捨已至潞安北境諸邑、北至石州之阻、深入五百餘
里、殺虜數萬、生靈汾州僅餘孤城、沿鄉攻破百堡、軍

民之害極矣。臣近繇平陽歷汾西一路，北出雁門，所至荒村破堡，壘壘相望，鷄犬稀聲，室廬焚毀，遺黎哭訴，骨肉殘傷，家業蕩廢，不忍見聞。虜欲旣盈，虜志愈肆，益以版升逆黨，轉相構煽，垂涎平陽澤潞，欲肆深犯。萬一突入太原，則徐溝以南，即可直上太行，侵擾

觀此知世廟冠劍如是。

冀南靈石以西，即可南越霍山，或繇興嵐鄉寧直入石隄，亦可徑出汾西，俱近平陽內地，處處無兵。城城鮮備，何恃自固？且虜入動稱數萬，沿山架梁，彌漫奔突，在邊兵馬旣難力拒，其衝腹裏官兵尤難責以接

戰。若非責成各道。督率軍衛有司。各守信地。高城深池。扼塞險阻。慎固城守。預遣哨探。多方收斂。堅壁清野。人皆可戰。堡皆可守。使虜攻不能克。掠無所獲。虜旣深入重地。沿邊兵馬。前後邀阻。必有斬獲。自將遯去。免復垂涎深入矣。必須查照陝西議定事規。每年春和。各道各將所屬城堡。嚴行有司。逐一踏勘。舊修者。是否城高三丈之上。城濠深闊二丈有餘。門櫓橋鋪敵臺角墩。有無全備。或責派軍民。或量動官銀。嚴限責修。務及秋完。仍選熟知道路土官。逐境踏閱。何

處通虜要路。可以斷塞。何處受敵戰場。所當防範。何山險隘。可拒而阻遏。何溝紆深。可伏而邀擊。何處可張疑以攝虜。何處可屯兵以示備。何處曾經虜患。民力可守。當令自固。何處僻在腹裏。民力脆弱。當設援兵。軍火器械。衣甲遮牌。凡守城禦虜之具。缺者補造。必多精完。無者修製。務極堅利。州縣大城。湧珠連珠。三眼快鎗。大小火器千餘件。火藥二三千斤。鄉村城堡。各五七百件。火藥各千餘斤。各城堡內外之守。選布有略。擊刺射打之法。訓練精熟。備查所屬軍衛官。

馬州縣有馬民壯額數。清除役占。選取精壯。編成伍隊。擇取知兵素任邊方軍職專司合營訓練。每衛所或千人。或五七百人。每州縣鄉保各千餘人。各分技藝。各攢伍隊。間日操演。弓矢盔甲。務各完備。騎射放打。務各中把。各存兵籍。仍將衛所各官。各分布城堡。責令隨帶教師教演火器守具。每秋定擬各道本境逼近太原大川及西路石關等口通虜衝要處所駐劄居守。即將素練軍兵。或分布要險。或統駐境上。果虜騎入關。分援城堡。伏守邀擊。雖未能戰却。大營之。

虜亦可擒。斬零搶之騎。虜知內地有兵。城堡堅固。必不敢肆志攻圍。遠越山險矣。節年撫臣。雖嘗分布責成。向未題奉。明旨。上下玩愒。率視故常。今歲虜勢異常。秋防期迫。各道缺官。兼以文場典試。必須撫臣酌量地里之險易。定委各道以署管。或卽擇各府佐貳分投經理。虜衝州縣正官。免取科場供事。卽如昔年汾州知州齊宗堯。初出試場。急回防守。始保州城。虜寇衝劇之地。守土者不可不知。或以晉謁各臺。而至城虛失守者。稍遲三日。幾至陷沒。其餘有司。責以專城之守。示以失陷之罪。戒其驕縱慢令之暴。考以武備修守之略。

以定其賢否。如或恃才妄作。傲上虐下。以搏擊爲丰
裁。而不恤民隱。依甲科爲怙勢。而不修武備。致有疎
虞者。聽各道指名參呈。撫按及臣軍門。定行遵照。
勅諭。應拿問者。逕自拿問具奏。應叅治者。會同叅究。
庶可保安全。晉生靈。免罹毒掠。虜患。臣亦知督臨鄉
土。若可襲故。勉成厚道。但目擊軍民之害。剝牀及膚。
武備之弛。緩急難恃。桑土綢繆之防。當先陰雨。待虜
伐謀之道。必於未至。即如石州之陷。州官全家殺戮。
督撫蒙辜。該道遣戍。上下交禍。悔將何追。伏乞 勅

下兵部議行山西撫臣查照陝西事規分道分境責成修守永保晉氓坐伐虜謀雖叢怨招尤義所難辭
禁通虜酌邊哨以懲風玩疏

資哨行周

照得大同各路逼近虜巢向緣將士怯懦虜酋貪狡

通人買和未貢市已前有此弊矣

索賄買和苟延歲月甚至沿邊各堡有月錢之科派

大邊墩哨有分帳之買賣坐致烽火不明邊防大壞虜入則墩夜無傳虜出而砲火始發各該叅守信地不嚴巡哨零寇不敢追逐擁兵閉門耕牧盡廢每遇虜入小失則隱匿不報大虞則虛張虜聲以十百爲

千萬動稱兵寡難敵。以媚虜爲舊規。詐稱追逐退逐。釀致沿邊軍民畏避殺虜。甘心出辦財帛。希求苟安。聞有一二有志忠勇。誓絕交通。敢事迎戰者。衆疾其不類。多方譖擠。甚至誘陷喪生。衆反爲監。邊紀陵夷。藩籬破壞。蓋亦有年。虜欲亡厭。虜志愈驕。邊堡日益孤危。邊民歲益窮困。國家歲以內帑列省百萬之軍。需養數萬守邊之將士。不足攝虜衛國。反以資虜損威。不忠不勇。罪歟何追。臣履任一月。歷查大邊墩哨。每墩十二名。二邊每墩七八名。俱月食糧二石。三邊

內地接烽。每墩三五名。月糧一石四斗五升。因地里之遠近。爲入糧之多寡。良以大邊遠駐虜巢時被攻殺。故優其糧賞。厚其優恤。恩至渥也。訪得大邊哨軍每二人貼一全。不坐哨專事交通時以糧銀私買貨物。深入分定虜帳。交結酋婦。展轉圖利。間得虜情。匿不實報。凡我兵動定。預爲虜傳。各路叅守等官。選哨既不擇人。稽查又無嚴法。聽其往來傳泄。反爲虜用。是每墩以二十四石之糧銀養十二人之奸細將焉用之。臣卽欲盡掣大邊墩哨。歲省萬石行糧。收回墩

軍自備防守。眾議以爲此輩雖多畏虜結納。亦有懷
忠實報。每遇大舉聚結。虜形及虜中密謀。尚可先傳
各營。深哨丁夜到墩。尚知進退。一旦盡掣。則哨丁不
敢遠出。遊騎將日近三邊。防範愈難。臣反覆思惟。兵
家云。三軍之事。莫親於間。賞莫厚於間。生間可使如
期而知敵之情。今欲選間入敵。勢所不能。必須先知
虜情。方可投機行間。此輩雖鮮忠勇。頗闇虜情。因用
此輩 既能通虜。可爲虜用。亦可爲我
○我○用○爲間。亦可得力。要在厚其資糧。俾可用餌。虜不受撲
殺。嚴其選查。俾畏法如敵。不敢欺誣。是亦兵家所不

廢議行大同鎮巡通查各路大邊遠墩若干每路止
存衝險一二餘俱掣哨免發各路各選本城忠實老
練有妻子身家軍夜二三十名分爲班次一月或兩
月一換每墩哨軍五名夜役二名令各相保結報實
虜情一體給賞誤事者同受責罰除原支行月糧二
石外卽以節省餘墩它軍行糧之銀每月給銀三兩
以充買道餌虜之資卽如各邊撫夷故事免令分貼
買閒無事聽其深入虜巢招降間諜密察虜情有警
聽其專夜傳報預我歛備每次出邊必給號票差官

押送三邊驗實糧米衣物無容夾帶軍火違禁貨物
點名放出返報必繇暗門驗實放入毋容私自入城
及家口不時近邊供饋傳泄庶軍數旣減人心可齊
法。今。旣。嚴。傳。報。可。實。恤。賞。旣。厚。撲。殺。可。免。耳。目。不。失。
而。招。降。反。間。次。第。可。行。矣。其。沿。邊。將。領。如。遇。小。警。敢
有傳報不實虛張虜聲惑亂兵機者聽臣查實先將
各中軍寫字哨瞭墩夜拿送軍門以軍法重治將領
等官指實參究輕者遍降祖職重者革職治罪原係
爲事官者照原犯發遣有能追逐零寇保全本境者

聽行旌薦。或加陞俸級。或贖免前罪。如仍通賄媚虜。閉門觀望者。參拿問死。庶法令昭赫。而夷夏大防。可漸振起。說者乃謂虜以得賄爲分定。猶可稍免。不肯騷擾。一旦禁革。恐虜欲不遂。日肆侵軼。邊患愈滋。臣思虜性貪躁。虜衆散逸。節年貪受。結納者。號稱走邊之猾騎。衆亦有數。而遠無求索者。尚衆。虜若久索不得。必將厭遁。且每次大舉深入。何嘗因賄可免。是通虜者。乃以構虜。而絕虜。乃以自植。若沿邊之守。可固。諸將兵勢相連。使虜小入。則各自爲戰。動遭挫折。大

概此知鑑川之圭貢市寔有長策制之非以結虜

舉則堅壁清野合兵奮擊難遂飽欲春冬或選銳出奇搗其巢穴。秋夏務拒險勵兵禦其深犯虜將相戒遠徙何敢復冀賄賂耶。但資哨行間事出創建絕虜致寇勢所必至。若非大破常格寬其文法則諸將既懷苟延安便之私復憚多事查叅之罪亦將搖首觸禁莫敢奮立伏乞勅下兵部再加詳議酌示機宐俾臣與該鎮鎮巡諸臣圖惟更始庶重鎮可漸保而邊防可慎肅焉。

覈功實更賞格以開歸民向化疏

招徠
人 疎

先准兵部咨前事該總督侍郎翁某題議照諸邊頻
年招引人口率皆中國被鹵奔命投歸各該將官中
間或有陰縱家丁悍卒戮歸人以冒陞賞者有家丁
悍卒守墩出哨通同擅殺捏報將官而將官反爲庇
護者又有歸人叩邊敦軍不在或坐視而不肯引送
歸人出不得已乘空而入經過地方有司盤獲因無
左驗誣爲姦細而竟坐以斬者傷天地之和阻來歸
之路虜中消息不聞而黨類日熾職此之繇必嚴殺
降之誅重招徠之賞歲終各該官員將招過人口開

○板○升○之○○東○顧○亦○詳○此○結○聚○

報兵部。摠計總兵官招至七百人以上。叅將至四百人以上。守備把總備禦官至三百人以上者。各議陞一級。不及數者。照常給賞等因。又准兵部咨該前總督王某題前事。該本部議擬覆奉 聖旨。這招回人口。叅將守備等官。各自効力。難得數多。總兵官合集衆力。數多爲易。今後叅將每四百名。守備等官每三百名。各陞一級。總兵除七百名。陞一級外。再多者。計數加賞。欽此。又准兵部咨前事。該前總督右都御史陳某題稱大同山西副總兵官。各有分轄地方之責。

以來招徠降人。如果數至五百名以上。議陞一級。不及數者。照常給賞。節該本部覆奉。欽依。備咨前來。俱經通行。欽遵。訖。臣自奉。命移鎮之初。遵照。詔旨。并題准招降事例。一面嚴禁殺降通虜之弊。一面刊發紙票。通行三鎮將領。各置木牌。徧插沿邊。通賊要路。示諭被鹵軍民。及西番瓦喇黃毛人等。若等雖有中國外番之不同。皆遭非狄。驕虜搶鹵。家口被其殺害。財畜被其刼掠。分賣各帳男子。牧放挑水打柴。婦人揉皮擠奶。備極辛苦。常遭不道。臊酋狠毒。劊扛。

各懷怨恨。不敢脫身歸降。恐逢追殺。又被板升逆犯。媚虜遮攔。反仇中華。逆天犯順。理數當誅。卽今聖明御世。逆虜數窮。天心悔禍。神人效靈。大雪烈風。嚴霜震雷。冬春殺草。揚沙牛馬多死。天降酷罰。老酋殆斃。神靈共厭。朝諭九鎮。選練精兵百萬。火器千般。一二年間。奉行天伐。分道出邊。掃犁虜穴。凡爾被虜華夷。各懷滅虜之憤。當摠效順之誠。矧爾被虜軍民。本吾赤子。雖被板升諸逆誘陷虜中。豈無天理良心。清夜仰天。能忘戀土。示諭爾輩。各室其仇。驕虜各思脫

禍有力者或殺獲虜酋。例得加官進爵。賞銀各千百兩。立致富貴。有謀者或勸道諸人歸順。數多亦同爵賞。其餘獨力不能謀爲者。各窺機便。或馬步投邊。或率衆歸正。自有應得賞恤。如仍畏避執迷。甘爲虜中奴僕。或聽諸逆反役虜地耕納。人心已死。天道必誅。將來進兵。盡從勦殺。投生無門。悔將何及。凡識字者。密傳與不識字者。中國人傳與西番黃毛瓦喇諸種一體知悉。及責成墩哨通夜。設法招徠去後。今據前因。臣查得三鎮一歲共招徠男婦二千二百二十六

名口騎來馬駝騾牛二千三百五十三匹頭隻中間
精壯男子願充通丁者查給月糧令其隨營報効老
幼併婦女願告回籍者俱給脚力口糧差人伴送寧
家馬匹頭畜令各自行變賣仍加優恤外爲照宣大
山西均屬邊鄙實被虜華人南歸之路昔緣不肖將
領殺降冒功坐致歸人絕跡淪沒虜中先臣洞徹弊
源有此建白一時人頗知悛畏仰荷 皇上好生之
德屢頒 明詔廣示招徠臣自蒞任之初奉揚德意
再四申飭是以虜中喁喁向化傾心歸正者不獨華

人接踵而來。夷種亦多舉帳效順。節據降人傳報虜

中諸人節將臣招降牌諭。密相傳記。或相對感泣。故

那吉之降不另題

請止于歸正人疏後

一歲之間。歸降數踰二千有奇。至于酋孫那吉之降。

帶出以未知朝議何如也

尤爲熙朝盛事。所據各該官員既有前例。相應題請

爲夷酋款塞酌議事宜疏

受款事宜

臣會同巡撫右僉都御史方某議照封疆邊事臣等
職任攸關。夷狄歸降。國家體統所係。詎容輕率。馴致
貽患。歷查虜酋俺荅擁數萬之衆。橫行塞外。幾五十
年。威制諸夷。侵擾邊圉。最爲強橫。把漢那吉的係俺

答親孫素所鍾愛。平時驕貴。非諸夷之比。今乃祖孫相忤。輕棄其親。千里來降。夫豈人力所致。茲蓋恭遇我皇上神武不殺。至仁無敵。格天心之助順。攝外夷以來王。適虜運將衰。神厭夷德。使之蕭牆啓釁。骨肉叛離。致此內變。臣歷考古晉漢唐盛時。夷狄歸附。往往有之。當昔處置。互有得失。謂其異類。因而殲之。平論古事深為得空者。固非王者大一統之仁。矜誇好大。寵幸逾制者。尤非尊中國賤夷狄之義。非仁無以柔遠。非義終以召禍。古有明徵。今可爲監。茲把漢那吉之來降。雖若甚

微其關係華夷之分。實當慎重。始之不謹。將貽後艱。
臣等再思。把漢雖俺酋之孫。乘憤而來。黨與寡少。非
率衆歸附之比。但宜給之宅舍。授之職銜。豐其餼廩。
易其服用。以悅其心。嚴防出入。禁絕交通。以虞其詐。
誘之以話言。示之以大義。攝之以兵威。亂之以醉酒。
以察其志。歲月既久。果無異心。徐爲錄用。俾其自效。
若俺答果肆勒兵。近邊索取。則明行曉告。許其生還。
諭以禍福。因與爲市。責令俺酋將版升諸逆賊首趙
全等。生擒解送。被掠人口。悉放南歸。然後優加賞給。

以禮遣還。一以陰中其老牛舐犢之思。一以潛奪其
兇頑啖噬之氣。彼雖豺虎。寧不知恩。晉逋獍梟。亦獲

正法。策之上也。若俺酋倚恃桀傲。稱兵強索。不可理

得力在我守禦有餘則思威可以兩行

諭。申飭諸將。嚴兵固守。隨機拒戰。俾再遭挫折。必思

悔禍。如構患無已。則明示盡殺以撓其志。彼若望其
生還。必懼我之制其死命。其心既奪。其氣易沮。計必

不敢大肆狂逞。而吾策可行。策之中也。若老酋昏悖。

假使俺答弃而不求則一時或以為無閑粗重故引

不顧其孫。弃而不求。則當厚加資養。訓以德禮。結以

漢事使之分立為庭實制虜之一奇也

恩信。如歷代待外國之質子。其部下餘衆。有相繼來

降者。就於各邊從便容收駐。牧責令把漢統領。略如漢人置屬國。居烏桓之制。俟老酋旣死。其子黃台吉必兼統其衆。因將那吉。加以名號。送還本土。令其收集餘衆。自爲一部。舊存部落。見故主之得歸。勢必響應。黃酋聞其姪之復反。勢必忿爭。彼若兩族相持。我則兩利俱存。彼若互相仇殺。我則按兵稱助。蓋推亡回存。把漢必知懷德。按此扞彼。黃酋亦自畏威。在彼將無暇侵陵。在我亦遂得休息。策之終也。若循習舊例。安置海濱。使之抑鬱愁苦。不過爲中國禁錮之囚。

使老酋聞其生存。日切南望。侵擾不已。後雖曲處。徒取夷輕。尤不宜給配諸將。使之隨營殺賊。立功報効。彼恃驕貴之素。不受驅策。駕馭失道。怨望斯生。頃生颺去之心。終貽反噬之悔。均非長慮。却顧禦虜安邊之室。再照那吉之降。本以少年未敢自決。皆係本夷乳母之父夷俗名爲奶公。各夷視同親父。即夷名阿力哥者。主持其行止。若可各賜一官。以慰其志。尤鼓舞之大機。使遠人遂歸化之心。黠虜得制禦之略。伏乞勅下兵部廣集衆議。如臣等所言不謬。酌定機

空。覆示臣等相機禦防。庶國體尊崇。恩威廣被。而封疆獲寧謐之休矣。

爲北虜納款執叛求降疏

納款機室

臣會同巡撫大同右僉都御史方某議。照天下有道。守在四夷。聖王法天。治大一統。惟茲北虜。種類寔繁。稟氣剛厲。帝王不能臣。歷代不能綏。自古爲中國患。始盛於六朝之分治。再盛於胡元之混一天命。皇祖掃除逐北。復中華帝王之統。再命成祖三犁虜庭。奠萬年夷夏之防。二百年來。每緣胡運之盛衰。馴

致邊疆之安危。在弘治初年。小王子尚有自大同三貢之例。先撫臣許進誌錄具存。在嘉靖初年。亦嘗開馬市數年。稍示羈縻制御之策。聽其強弱去來。惟有其勢而禦防之耳。惟茲俺答黠酋。雄據漠北。侵擾九邊。攻城陷州。越關犯薊。其收用中國妖逆。搶虜番夷部落。年逾六十。衆至十餘萬。東脇朶顏三衛爲嚮導。西調河套吉囊子孫爲羽翼。歲遇秋高。狡謀糾犯。震驚畿輔。流毒九邊。征之勢難蕩平。禦之每患寡分。兵疲于入衛。財匱於供邊。仰屋君父之憂。下貽

軍民之害皆此酋爲之禍首茲者仰仗 天心助順
聖武布昭孽孫那吉偶以小忿而求降獍子黃台吉
既肆突犯而被挫遂使老酋坐伐強索之謀頻興效
順之念臣等適當其難身任其危仰遵 廟謨誓同
撫鎮多方宣諭委曲開誘當老酋厭兵悔禍之時適
黃酋畏死戒侵之運既已投詞納款仍各專使懇乞
冀得授一爵之寵榮永爲 皇明之藩夷查照國初
忠順王舊制及西番土魯番沙壇滿速及沙速王近
例似應俯順夷情量爲封錫定其歲貢之額期示以

賞賚之等第。俾其統率諸酋。各居漠北。永爲番國。免
貽邊患。聿光 皇朝大一統之盛治。式昭 聖明賓
四夷之至德。在 朝廷不惜一命之渙頒。於國威爲
益振。在邊疆可絕驕虜之侵擾。於國體爲益尊。責以
執送叛逆。許以生還那吉。并黃台吉亦如那吉量授
一官。以固結其父子祖孫之心。是假以位號。以羈縻
胡虜。非以鱗介而易我冠裳也。但封錫之典。上關國
制。未可輕允。或先給二酋以賞賚。嘉其納款之誠。責
令另具真正番文。如各國體式。奉表稱臣。後議封爵。

先令執送逆犯趙全及弟趙龍丘富孽子丫頭李自
馨劉四劉五其周元楊孟秋俺答既稱各以軍民被
虜原未教誘攻戰伊欲留用寫字姑容在虜令其書
寫番文教道禮式先許遣還那吉以昭威信其善後
之圖責在疆場既須慎始尤當慮終夫夷狄之服食
雖與中國異而日用之布帛鍋釜不能不資中國以
爲用故連年深入搶鹵凡民間鍊器衣物無所不攜
今一旦許其通貢則酋首歲有優賞自可充用絕其
搶掠則虜中萬衆衣食將無所資而沿邊刁搶鼠竊

之患勢必難免。故虜使於乞和之初。即有求討鍋布之懇。必須許以市易。以有易無。則和好可久而華夷兼利。查得各邊如遼東。開元。建昌。肅州。西番。諸夷。限其開市之時月。估其物價之定值。擇其邊外近地。各設守市官兵。許其兩平貿易。以濟華夷。嚴應禁火藥。兵刃。諸物通販之禁。立奸民圖利詐騙之罰。庶虜衆不困於衣食。而鼠竊之患可免矣。再照夷虜之性。驚急而狐疑。兵家之機。易失而難轉。今老酋急於得孫。誓絕羣言。矢志納款。冀得名號。雄于醜類。若一失其

望。則。孫。亦。不。恤。而。憤。必。狂。逞。雖。防。禦。之。具。未。敢。坐。弛。
其。疆。場。之。優。勢。必。延。蔓。伏。乞。勅。下。兵。部。會。同。禮。部。
廷。臣。早。爲。集。議。定。擬。上。請。勅。示。臣。等。遵。奉。施。行。豈。
惟。趙。全。等。叛。逆。即。可。立。致。正。法。則。俺。荅。未。死。之。年。那。
吉。承。繼。之。後。必。將。感。恩。思。報。誓。絕。侵。擾。疆。場。幸。甚。臣。
等。幸。甚。

酌議北虜封貢事宜以尊國體疏
北虜封貢

先於本年十一月初一日北虜俺荅遣使納款乞封
通貢。獻逆求孫。誓不犯邊。臣等據實會請。隨蒙勅

下兵部覆議奉

聖旨是虜酋旣輸誠哀懇且願執

叛來獻具見恭順伊孫准遣還仍賞綵段四表裏布

一百疋其進封進貢一節着總督鎮巡官詳議停當

具奏欽此欽遵隨於本月初八日俺答執逆逆犯趙

全等八名到邊臣等已於本月二十二日將伊降孫

現在那吉遵

旨以禮遣還訖續據俺答復遣夷使

執文來謝申訂前盟仍請討表式表牋臣許以咨行

禮兵二部定議查發及候咨部請發鞞韃館譯字生

待其表使至日以便譯處間查得俺答原來番文內

雖於臣等俱頃首稱謝，但稱吉囊大把都未曾意會。
不入千東欲掠千西也

伊父子部落四萬，永不入大同地方中間似有詭譎
推諉之情，且老把都係俺荅親弟，部落三萬餘見駐
宜府三衛迤北吉囊係俺荅故兄夷名，其子孫吉能
等衆酋盤據河套河西爲陝西延寧甘肅之害，俱係
俺荅嫡親弟侄，其親族兀慎擺腰永邵卜哆囉土蠻
等酋俱各分駐山大沿邊，尤爲俺荅本統親枝，設有
一枝未附即可推諉爲奸，必須俺荅大爲會合同心
內附，在俺荅行輩爲尊，衆莫敢違，或可封一王號，其

各酋長必須各授一官。如三衛故事。方可羈縻衆酋。免復東西窺犯。臣即面命各夷。仍書宣諭。傳示俺荅。務令會令老把都吉能同表進貢。方爲准請。其土蠻一枝。原係俺荅各夷故主。近伊恃強背負。每思讐殺。今俺荅自稱彼力不能招徠。臣訪得老把都外與土蠻交往不失。內與黃台吉親依尤切。本月初五日。適黃台吉差真突來謝。臣亦諭令會合其老把都。傳示土蠻。同爲內附。雖土蠻從否難期。亦可破三衛交構之私。歆土蠻來歸之念。果俺荅各酋旣已來歸。則土

俺荅與土蠻交惡老把都與土蠻相善可謂深得一

一情

蠻之勢自孤而薊鎮之患可免。即如今秋俺答諸酋一不東行，則土蠻聚兵止犯遼左，未敢復窺薊昌。蓋土蠻每資俺黃諸酋之兵力爲輕重，而河西吉能部落尤依俺酋爲聲援。故必令會合諸酋，方可允其錫封，許其通貢。均弭九邊之患，否則一枝未附，即可推諉爲姦，虜情多狡。有難遽信。今據俺答糾合老把都吉能永邵卜各部落議允內附，各遣夷使一十八名，仍賞番文，內開俺答俱已糾會各酋同心進貢，各令夷使於本月初十日見臣示信。臣督同總兵官馬芳

兵備參政鄭洛、副使劉應箕、廖逢節詳審各夷執稱各酋俱知。聖朝曠蕩之恩，悔從前侵擾之罪。以後願戒不犯各邊，專心通貢開市，以求華夷各遂安生。情已真的，臣復諭以須各守盟誓，不許背逆。天道敗盟負恩，自取征討。各夷對天發誓承允。問隨據吉能夷使八名，懇稱自今以後，河套各酋誓不犯邊。但各鎮兵馬慣事搗巢趕馬，恐失大信。今願傳諭榆林寧夏固原各邊外住牧虜賊，不許擾邊。仍乞臣傳諭延綏榆林寧夏固原莊涼各沿邊一帶將領，不許遣

丁出邊遠地燒荒赶馬搗巢共結和好臣思夷狄之
狡性難馴。朝廷之法令當一。臣今既蒙倚畀各
酋同事納款誓不入犯必須請旨行各邊禁止搗
斃庶可昭聖朝之威信大慰夷心絕構怨之近圖
永弭邊患其表式譯字生之議發節准禮兵二部咨
開查無各國體式聽臣自撰給虜譯字生必須臣題
請方可議發臣方咨請之時日望各部據爲議題給
發已約各夷尅期來領今夷使再至而部議未發臣
將何以應虜除摘留夷使數人在鎮守候仍遵照

明旨分投差人行陝西督撫諸臣各照節年事例慎
戒冬防一體暫免出邊擣巢趕馬以安夷心共俟通
貢外伏乞 勅下該部查照施行

再奉明旨條議北虜封貢疏

北虜封貢

兩事情定不同謀者未審故引以比論

臣查得先年開市之議起于逆犯仇鸞媚虜之私故
虜志方驕而叛盟搶市之禍立至今日乞封之議起
於老酋老年厭兵悔禍之情及感戴 天朝歸孫賞
賚之恩既納款乞封爵於求孫之始復遣謝請表式
於得孫之後遵訓糾合其弟侄傳語各部落永不邊

駐塞候命。頃首稱臣。萬非管肯。兩地爲市。辱國費財。
玩寇自寬之比。虜若奉職通貢。國制即有待各夷國。
之常典。彼若叛盟不至。各邊自有邊防之守具。撻伐
之兵威。何能要我難繼。干預我中國之邊備耶。況且
今次虜酋納款。旣非請開馬市。其中議開市一節。如
遼東開元廣寧開市。聽夷商自相交易。亦非以官爲
市。糜費京運銀段之比。已行三鎮鎮巡各道將領等
官查照節行。逐一從長計議。各夷乞封通貢。作何規
制。封疆內外。作何界限。開市有先帝禁例。必難復

行其今次通貢事理、有無與開市相同、查照弘治年間、北虜通貢事理、應否准許、間准兵部咨爲循職掌陳愚見議處國家大計、以圖萬世治安事、該兵科都給事中章某等題稱、臣等竊惟天下之事、懲前方可、以善後、謹始乃所以慮終、方今四夷之中、北虜爲強、而北虜諸酋之中、俺答父子爲最、頻年以來、擾亂我邊疆、蹂踐我人民、荼毒之慘、所不忍言、幸賴天心助順、宗社顯靈、皇上神武宸斷、主持于中、邊臣宣力效勞、區畫於外、啓那吉之慕義來降、致俺答之執逆

奉獻使叛逆賊子明正典刑伸中國之氣懾醜夷之心誠爲處置得宜無容別議矣但修表稱臣進貢開市一節利害禍福所關於國家者甚大臣等反復思惟夷狄之患自古有之方其強也雖漢唐全盛之世且不免平城之圍及其衰也當元成積弱之嘗亦嘗有稱臣之舉故自古帝王之於夷狄來則拒之去則不追惟治之以不治而已今俺黃諸酋控弦擁衆屯牧邊外不下數萬其強可知近以伊孫那吉得遂生還又蒙聖恩賞賚撫恤恩威並著渠乃因欲奉表

稱臣入貢開市。固諸酋懷德畏威之心。而其實亦欲

北亦夷人本心

假此以邀中國之利也。臣聞北虜不耕不蠶。衣食之用資于搶掠。既云通貢。則在彼當有進獻之儀。在我當有撫賞之費。今當議和之初。正宜講求之際。假如進貢人有若干。在何處候。旨。撫賞當有幾次。用錢糧幾何。或酋首雖不犯邊。而零賊侵擾者。作何區處。或部落潛入鹵掠。而推諉別賊者。作何禁止。至于馬市一節。先年已曾准開。不旋踵而即渝約叛盟。已蒙先帝嚴旨禁行矣。今俺荅乃復以此爲請。臣等竊料

狼子野心、必不能如約、縱諸酋如約、而羣虜闐然、規利勢、亦不能使之不叛也。凡此皆今日所當講究、酌議者。乃總督王崇古奏內、曾未見明悉前後事、臣等職掌所關、竊以爲此舉乃國家大計、宗社安危之所係、不厭詳悉、慎重、此所以不能已於言也。隨該本部議覆、仍行臣查照本部該科、先今題議事理、逐一從長計議、停當、作速具奏、定奪等因、備咨到臣。職反覆細玩、蓋爲邊情重大、必須裒益衆議、庶爲停妥、其爲國家慮、至深遠也。但兵家之事、勢難遙度、而邊方

之舉動。必邊臣之親閱夷情者。乃爲周知。卽此俺答請封乞貢一事。職戴罪陽和。日與總督王某計較論量。蓋亦籌之熟矣。懸爵位之虛號。以邀荒裔之臣伏。開入貢之舊道。以紿狂虜之奔趨。定交易之規則。以示中國之羈縻。古今控馭非虜之上策。恐無出於此者。陛下之視崇古。豈爲輕躁之士。而寡謀之人哉。夫夷狄之爲中國患。從古以來。五帝三王。未有能臣之者。今一旦改慮輸誠。求欲內附。稱臣上表。乞貢索封。茲乃 天地 祖宗之靈。皇上恢弘之烈。顧可

以輕阻之哉。而議者比之於馬市。職竊以爲過矣。夫
往年之開馬市者。虜騎充斥。憑陵中土。逆鸞受世
宗皇帝之重委。不能建功沙漠。乃爲此媚虜之計。欲
以此中俺答之欲。以求緩旦夕。與宋之納幣何異。其
事既不出於俺答之本心。而益以起狂虜之驕。志是
以東堡交易。西堡殺人。虜焰日熾。莫可收拾。往事具
在卷籍者。可考也。今俺答卑詞遣使。奉表稱臣。自比
屬國。如西漢左賢王之例。其兩次貽書於督撫。殷勤
請託。非如晉日擁兵壓境。挾其驕橫之勢而坐索也。

其夷使之來者。稽顙請乞。俯伏階庭。非如昔日倨傲抗禮。奔走中國使臣而奴使之也。故每一會審。職與胥臣竊歎。以爲呼韓稽顙。單于接踵。古今聖帝明王之盛。復見于今日。非我聖天子建中和之極。精誠上格。神化覃敷。曷克致是哉。職封疆之臣。非不能爲大言抗絕。以聳動展聽。但俺酋旣已兩次遣使。若重爲拂逆。非惟阻其向化之念。抑亦挑其忿憾之心。職恐邊方自此又多事也。盍許其通貢者。非恃其和好。并中國之防範戰守之具而悉撤之也。掩荅果向

順也。年年進貢。則華夷得所。中外兩安。即此天未陰
雨之時。正我綢繆牖戶之日。自此修頻年不可修之
堡。自此耕塞外不可耕之田。自此練春秋不可解之
甲。一年安靜。一年之修備也。十年安靜。十年之整頓
也。萬一俺酋弗率。違背前好。侵我邊疆。即將閉關絕
使。整戈秣馬。與之馳驅疆場。今其稽顙向順。乃拒之
而不納。及其跳梁怒背。又撫之而不能。不幾於朱策
耶。伏願陛下大奮乾綱。主張於上。輔臣昭鑒贊翊
於中。成此古今帝王未有之鴻烈。光昭千萬世無疆

之曠典誠邊方莫大之幸也